

*Præstantissime GÜNTHERE, majoris esse prudentiæ, hoc specimen Tuo, erudito illo atq; utilissimo, clarissimè demonstrasti. Statum nimirum Christianismi statibus animalitatis & humanitatis comitem imò ducem associasti; hos nimirum è ratione cognoscens & depromens, illum verò è Theologia eâ, quâ decet, circumspèctione, in modum præsuppositorum decenter mutuatus. Præterea, de omnibus, quid sint & quo differant modo, in Capite primo distinctè dixisti, horumq; omnium in moralibus usum in secundo perspicuè subjecisti; ostendens sic, piè simul atq; doctè doctrinas Christianæ Philosophiæ pertractari posse. Quid faciam ego, quàm ut applaudam Tibi publicè, priscumq; illud acclamem animitùs: Feliciter!*

C. B. D.

## CAP. I.

De

# Discrimine trium horum Statuum.

TH. I.

**I**N Scholis Physiologorum illud non minùs ἀγάδοξον quàm πολυθρύλλητον: *Hominem primùm vitam plantæ, deinde bruti, tandem hominis vivere, passim auditur, eoq; triplex noster Status, pro diversis tribus temporibus, nervosè indicatur. Primò nimirum vitæ nostræ tempore, maximè, quamdiu intra uterum maternum adhuc delitescimus, instar plantarum crescimus tantùm atq; nutrimur, nihil aut parum sentimus; Secundo, quando in vitales auras prodimus, plura magisq; manifesta sensuum, non æquè rationis indicia damus, adeoq; in morem brutorum nos gerere videmur; Tertiò verò id, quod proprium nobis est, Rationis nimirum opus, tametsi non absq; gradibus, jam minùs, jam magis, edimus, hominumq; titulo nos dignos esse factò ipso probamus.*

A 3

TH. II.